



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Agostu 2009

Edisaun : Agostu 2009

Julgamentu ba Kazu Krize 2006 hasoru Arguidu ho Inisial “OK”

Adiadu Tan

Bazeia ba orariu julgamentu iha Tribunal Distrital Dili ne'ebe JSMP assesu katak sei hala'o julgamentu primeiru ba kazu ne'ebe involve arguidu na'in rua ho inisial “OK” no “Al Osu”. Tuir Ministeriu Publiku katak arguidu na'in rua ne'e involve koletivamente komete krime iha fatin publiku kontra ema seluk no sasan ema seluk nian bazeia ba iha Artigu 170. (1),(2),(3) Kódigu Penal Indonezia no uzu armas illegal, munisoins no material explosive ilegalmente bazeia ba regras iha Regulamentu UNTAET Artigu 4/4.7 durante krize 2006 nia laran. Maibe julgamentu ba kazu refere la bele hala'o tanba entre juiz kolektivu ne'ebe mak toma konta ba kazu ne'e na'in rua la marka prezensa hodi hala'o julgamentu tuir orariu ne'ebe determinadu ona. Nune'e mos arguidu sira la marka sira nia prezensa iha tribunal tanba seidauk hetan karta notifikasaun husi tribunal.

Maski nune'e, bazeia ba informasaun ne'ebe JSMP assesu katak Tribunal Distrital DILI hasai tiha karta notifikasaun ba arguidu sira liu husi parte PNTL. Maibe advogadu “arguidu OK” rezeita katak ninia kliente la hetan notifikasaun pessoal, no agora ninia kliente iha hela Los – Palos. Entretantu arguidu sira seluk mos la marka sira nia prezensa iha julgamentu refere tanba la hetan notifikasaun, nune'e sira mos la hatene klaru orariu julgamentu iha loron ne'e, hanesan informasaun ne'ebe hato'o husi advogadu ba kazu ne'e iha sala audensia laran.

JSMP simu ho laran haksolok ba esforsu husi Tribunal Distrital Dili ne'ebe ho intensivamente komesa prosesa kazu ne'ebe akontese desde krize 2006 bazeia ba rekomendasoins husi Equipa Komisaun Espesial ba Inkéritu Internasional. Maibe JSMP

mos nafatin lamenta ba andamentu prossedimentu ne'ebe neneik tanba deit problemas tékniku. Tanba ne'e JSMP rekomenda ba Tribunal Distrital Dili atu ba futuru bele kolabora diak ho Departamentu Investigasaun PNTL ninian, nune'e problema hanesan sei la akontese tan hodi prevene adiamentu ne'ebe tuir loloos la presiza akontese. Durante monitorizasaun JSMP, ami nota katak kuaze iha tribunal distrital hotu infrenta problema hanesan no dala barak problema refere lori impaktu ba orario prosesu julgamentu ne'ebe antes ne'e marka tiha ona.

Julgamentu ba kazu refere sei hala'o fali iha loron 6, 9, 13, 16 fulan Outubru 2009, no JSMP espera katak iha julgamentu ne'ebe markadu tiha iha loron ne'ebe refere iha leten sei la adia tanba nune'e sei la fo imagen ba povu katak sistema judicial Timor Leste la produtivu no efetivu hodi harí lei no justisa iha estadu ne'ebe mak hamahan aan iha Estadu de Direitu ne'e nai okos

Atu hetan informasaun kle'an favor kontaktu:

Luis de Oliveira Sampaio

Direktór Eksekutivu JSMP

Diresaun e-mail: luis@jsmp.minihub.org

Landline: 3323883